

Bosna i Hercegovina
Federacija Bosne i Hercegovine
Zastupnički dom Parlamenta Federacije BiH
Klub zastupnika Demokratske fronte

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Prilježeno: 16-06-2020			
Org. jed.	Broj	Priloga	Vrijednost
01-	02-	1141	20

Zastupnički dom Parlamenta F BiH
n/r predsjedavajućeg, Mirsad Zaimović
prema Vladi Federacije BiH

Na temelju člana 172. Poslovnika Zastupničkog doma Parlamenta F BiH podnosimo u parlamentarnu proceduru:

Prijedlog Zakona o izmjena i dopuna Zakona o unutrašnjoj trgovini (Službene novine FBiH, Broj: 40/10 i 79/17)

Član 1.

U Članu 24. u stavu 1. briše se zarez ispred riječi „radno vrijeme“, te se brišu riječi „radno vrijeme u dane državnih praznika i neradnih dana“, a ostali dio teksta ostaje isti.

Član 2.

U članu 24. stav 3. brišu se riječi „radno vrijeme u dane državnih praznika i neradnih dana“, a ostali dio teksta ostaje isti.

Član 3.

U članu 24. dodaju se novi stav 4 i 5 koji glase:

„4) Trgovac je dužan poštovati državni praznik i neradni dan u skladu sa Odlukom o neradnim danima koju donosi Vlada FBiH na prijedlog nadležnog ministarstva, a na način da omogući svim radnicima slobodan dan, osim u slučajevima kada priroda posla, odnosno tehnologija procesa rada zahtjeva neprekidan rad.

5) Ukoliko priroda posla, odnosno tehnologija procesa rada zahtjeva neprekidan rad, Ministarstvo za rad i socijalnu politiku FBiH će odrediti koji privredni subjekti mogu raditi i u kojem obimu u dane državnog praznika“.

Član 4.

U članu 64. stav 1. dodaje se nova tačka j) koja glasi:

j) „ako postupi suprotno odredbama člana 24. stav 4. i 5. ovog Zakona“.

OBRAZLOŽENJE

UZ PRIJEDLOG ZAKONA O IZMJENAMA I DOPUNAMA ZAKONA O UNUTRAŠNJOJ TRGOVINI

I - USTAVNI OSNOV

Ustavni osnov za donošenje izmjena i dopuna ovog zakona sadržan je u odredbi Člana III. 1. tačka b.), „koja je izmjenjena amandmanima VIII, LXXXIX I i CVI i članu IV.A.20.(1) d) Ustava Federacije Bosne i Hercegovine prema kojoj je u isključivoj nadležnosti Federacije Bosne i Hercegovine utvrđivanje ekonomske politike, a Parlament Federacije Bosne i Hercegovine, uz ostala ovlaštenja predviđena Ustavom Federacije Bosne i Hercegovine, odgovoran je za donošenje zakona o vršenju dužnosti federalne vlasi.

II - RAZLOZI ZA DONOŠENJE IZMJENA I DOPUNA ZAKONA O UNUTRAŠNJOJ TRGOVINI

Predložene izmjene i dopune Zakona o unutrašnjoj trgovini uzrokovane su nedostatkom jedinstvenog zakonskog rješenja o praznicima u Bosni i Hercegovini. Činjenica je da je Bosna i Hercegovina jedinstveno ekonomsko područje i kao takva trebala bi biti jedinstvena i kad su u pitanju radnička prava. Na žalost, radnici u Federaciji BiH nemaju zakonsku mogućnost da se koriste slobodnim danima u dane praznika, posebno oni koji rade u realnom sektoru.

Naime, rad u dane praznika je regulisan Zakonom o praznicima („Službeni list R BiH, broj: 2/92 i 13/94) koji je preuzet od Republike Bosne i Hercegovine. Zakon o praznicima određuje da se u FBiH obilježavaju sljedeći međunarodni praznici:

- Nova Godina (01. i 02. januar - neradni dani),
- Prvi maj (01. i 02. - neradni dani),
- Dan pobjede nad fašizmom (09. maj koji se obilježava radno).

Drugi praznici u FBiH su:

- Dan nezavisnosti Bosne i Hercegovine (01. mart) i
- Dan državnosti Bosne i Hercegovine (25. novembar)

Na žalost, poslodavci u realnom sektoru, uglavnom, ne poštuju ovaj Zakon, te on važi samo za radnike i radnice iz državnog sektora.

Zemlje u okruženju, pa čak i entitet Republika Srpska navedeno pitanje riješili su kroz donošenje Zakona o praznicima tako da je samo u Federaciji BiH ostalo neriješeno pitanje rada u dane praznika.

Prijedlog Zakona o praznicima za teritoriju Bosne i Hercegovine duži niz godina stoji u Parlamentu BiH, te je u više navrata rečeno da za donošenje istog ne postoji politički koncenzus i da isti neće biti razmatran. Iz istog razloga i u FBiH je nerealno očekivati donošenje Zakona o praznicima. Ovo pitanje je moglo biti riješeno i kroz Zakon o radu što su i sindikati zagovarali ali zakonodavac nikada nije uvažio ove sugestije i inicijative u proteklom periodu.

Imajući u vidu sve navedeno, izmjene i dopune Zakona o trgovini su jedini način da se radnicima u ovoj oblasti omogući jednakost u pogledu korištenja slobodnih dana za vrijeme praznika. Praksa pokazuje da su najugroženiji radnici u pogledu rada u dane praznika upravo trgovci koji su slobodni samo 01. januara.

III - OBJAŠNJENJE PREDLOŽENIH RJEŠENJA U ZAKONU

Članom 1. i članom 2. brišu se odredbe koje spominju radno vrijeme u dane praznika.

Članom 3. dodaju se novi stavovi 4 i 5. Stavom 4 nalaže se trgovcima da poštuju Odluku Vlade, odnosno nadležnog ministarstva, te da omoguće radnicima slobodan

dan u dane praznika. Stav 5) omogućava izuzetke u pogledu poštivanja Odluke, te Odluku o izuzetcima prepušta nadležnom ministarstvu na odobrenje.

Članom 4. predložena je kaznena odredba za nepoštivanje Odluke Vlade o neradnim danima

IV - FINANSIJSKE IMPLIKACIJE PREDLOŽENIH MJERA

Za provođenje predloženih mjera i dopuna ovog Zakona nisu potrebna dodatna finansijska sredstva

Sarajevo, 16. juni 2020. godine

Klub zastupnika Demokratske fronte

